



*Nei Akoako*

# Newsletter

Issue no.2 07 August 2020



## Aobitin Tararuan te Otabwanin

### Botaki n Mwakuri ibukin Enwaeromenta, Aba ao Karikirakean te Ununiki

#### Kam na bane n Mauri!

N te ribooti ae kimototo aio ao tina kaoti bwaai aika a tia n karaoaki inanon te namakaina ae Tuun(June) ao Tuurai (July) n te ririki aio, 2020.

Aikai bon rongorongan mwakuri ma waaki aika a tia n karaoaki man te Botaki n mwakuri ibukin Enwaeromenta, Aaba ao Karikirakean te Ununiki n mwangana ae Aobitin Tararuan te Otabwanin.

Tamnei ma rongorongo aika ana oti ikai a bane n boboto iaon ana kakamwakuri n kabane Aobitin Tararuan te Otabwanin n itera aika a kakaokoro ibukin Tararuan Te Otabwanin.

#### Bwaai aika riki:

- Bobonga te katamaroa nakon MRF	2
- Ana moan Bwabwaro BUR	3
- Boutokaan katokakin kabonganaan te plastic ao te itiaki	4
- Kamatoaan te Reitaki ma te Botaki n Bureitiman.	5
- Karaon Tutuo nakon Moan rinan n Reirei	6
- Boutokaan Bongin Kamanoan ao Kawakinan Maeun Te Tonga n Te Aonnaba	7



## Bobonga te katamaroa nakon te tabo n Kaoki Maange ke te Material Recovery Facility are i Betio

E a tia n bobonga mwakurian te katamaroa nakon te tabo n Kaoki Maange ke te Material Recovery Facility (MRF) are i tabon te Uaabu i Betio. Aio are e moanaki karaoana man 13 n Tuun ao n bobonga inanon 19 n Tuurai te ririki aei 2020. E kairaki te mwakuri n katamaroa aio iroun te MELAD ao n boutokaaki man te MISE ibukin kabonganaan bwaai n mwakuri aika mitiin ake a kainanoaki ibukin kamwaingan maange aika a bubura. Aio te waaki are e baireaki imwiin motin te bowi n te komete are e tabeakina te itera aio moararariki ibukin kauarerekean te kabuanibwai n kaineti ma te urarake are e a tia n karina n riki nakon te MRF tabeua te wiiki n nako inanon te ririki aio.

Te Material Recovery Facility bon te tabo are a kawakinaki iai maange ake a bubura rabwataia n aron taian mka n kaa, mka n kaonteina, mka n biiti aika a bubura ao ai uana naba ma maange ake maangen bwaai aika a maiu man te iti, bateren taian kaa ao ai maange ake a recycled ke a riai n nakon te kaoki maange. Te kantaninga n karaoan te kaitiaki ma te katamaroa ao barongaan raoi nanon te MRF bon ibukin totokoan kanganga n aron te urarake, kamwawaan te kawai ma te mataroa n rinnako nakon te MRF nakoia te boota-n-aomata ibukin mauria n rokoia n nikira aia kaoki maange. E karaoaki te mwakuri n kaitiaki ao n katamaroa aio inanon te maan ae tebwi ma teniua (13) te bong n ti te wiikente. E moanibwaiaki te kaitiaki ke kamwaingan taian mka n kaa man te tabo are e wene iai ana bwaibu n bwaa te KOIL kioina ngkai aio te tabo are e rang mwaiti iai taian scrap n katukaki ke n karenakoaki ao man kona naba n moantaa n karekea te kanganga nakon bwaibu ni bwaa aikai.

N kaineti ma kateimatoan te tamara ao te itiaki nakon te tabo ni Kaoki Maangeao ao iai kainibaire iaon kabonganaan te tabo aio ake a riai n iraki nanoia, ike e kantaningaaki bwa bon ti taan kaoki maange aika a na kona n rin inanon te tabo ni Kaoki Maange ibukin aia katine tiin/raabwa ao baetere. Te tai n karenako maange n aron te mka n kaa ke biiti bon ti te Kauabong n katoa wiiki. Tiaki ti ngaia ma taan karenako aia maange a na riai n reitaki moa ma te MELAD n aobitina are tabe ma tararuau te otawanin ibukin tuoakin aia maange. E kakawaki naba bwa e na kairaki raoi man tararuaki karaoan te karenako maange irouia aomata iroun ana Aabitia te MELAD-ECD ao te Security n te MRF n reitaki ma kanoaan te booma ibukin tauan mwiin maange ake a na rin n te MRF. N te tai aio ao e bon aki kariaiakaki kakaean taian spare parts irouia aomata inanon te tabo ni kaoki maange aio.

Boutokaan karaoan nanon kainibaire aikai man ana itera te botannaomata bon ngaia te anga are e na kona n kauarerekean te kanganga nakon te MRF.



Before



Before



After



After



Ea tia n karaoa a na moan bwabwaro n katauraoi ke a na inception workshop te Karikirake ae te Biennial Update Report (BUR) n te bong ae te Kaabong, uoua (2) n Tuurai 2020. E karaoaki te bwabwaro aio n ana boardroom te Kiribati School and Centre for Children with Special Needs (KSCCSN) I bikenibeu ike e a kaainaki irouia aobitia man a na botaki n mwakuri te Tautaeka tabeua, a na kambwana te Tautaeka, Rabwata aika a inaomata ke NGOs, Botaki n Aro, ao ai a na kuura n reirei Kiribati aika a rietata. E barongaaki karaon te bwabwaro aio man te Botaki n Mwakuri ibukin Enwaeromenata, Aaba ao Karikirakean te Ununiki n mwangana ae Aobitin Tararuan te Otabwanin

Oin taben te BUR ke te Karikirake aio bon karaoon ana moan ribooti Kiribati ke Te Kiribati's first Biennial Update Report are e na boboto iaon riibotinakin mwaitin ma katein nako kaeti (greenhouse gases) ake e katiinakoi Kiribati man a na karikirake aika a kakaokoro ake iai irekerekeia ma kanganga iaon Bibilitkin Kanoan Boong (Climate Change)

ti aki ti ngaia ma riibotinakin naba aanga ma kawai n kauarerekei mwakuri n karikirake aikai (Mitigation activities and their effects). Te Karikirake aio e nako mai iaan te rabwata ae te United Nation Framework Convention on Climate Change.

Moan te kakawaki karaon te bwabwaro aio kioina ngkai aio te moan mwaneka ae moan te kakawaki ibukin karaon kamaatata nakon rabwata aika a kakaokoro ake iai irekerekeia ma katabwaninan ao rikoan rongorongo ake a na rang n kainanoaki ibukin karaon te riibooti aio (BUR)ike a na kona ataia bwa baikara bwaai ae kainanoaki man a itera ake a na kona n anga iai aia ibuobuoki ibukin katabwanian a na moan riiboti Kiribati n aia itera aika a kakaokoro.

Iai te kataninga ae e abwabwaki bwa imwin karaon te bwabwaro aio ao e na reke te mataata ae tabwanin irouia rabwata aikai ike e na rang n baiti ao n butiraoi aron mwakurian ana Moan Riiboti Kiribati aio.

## Boutokaan Katokakin kabonganana te Buraetitiki (Plastic) ao te itiaki inanon bongin bukamaruan ana ka-41 n Inaomata Kiribati

Inanon bongin te bukamaru ibukin ana ka-41 n ririki n inaomata Kiribati n Moanibong te 13 n Tuurai 2020 e karaoa iai ana waaki n kakaongora ma ana kauring Te MELAD (Botaki n Mwakuri ibukin Enwaeromenta, Aaba ao Karikirakean Te Ununiki) n mwaanga aika Aobitin Tararuan te Otabwanin ao Te Ununiki iaon te karenako maange n aki akaka, katokan kabonganana te plastic, kbonakoan aroka ao a bati riki . Aio ana waaki te tabo n mwakuri aio ibukin boutokaan katokakin kabonganakin te Buraetitiki ke te Plastic, boutokaan te itiaki ao ai kaungaan te Ununiki irouia te Botannaomata.

Irarikin akanne ao e karaoa naba ana kakaongora iaon Tuan te Otabwanin, Kaongora iaon ana urubwai te Maange nakon marin te aba ao Taari, ti aki ti ngaia ma kaungakia naba te botannaomata kabonganakin tenaan Reusbale Bags n onean mwin te plastic bag ao ai kaboan aroka man maangen plastic ao maange aika aki mka. 1 te green bag ao e kona n reke arokam 5 ke nimaua te kabwebwe. Aroka ake a kaboonakoaki n te tai anne bon ti te kaabiti ao te kuukambwa.

Iai te katautau ae e abwabwaki bwa ena teimatoa karoan aio n katoa ririki.



## Aikai Tabeua riki tamnei ibukin te Bong anne

E tia n karaoa ana maroro Aobitin Tararuan te Otabwanin ma te Botaki n bureitimana n aia station nako aika a kakaokoro mai Bonriki nako Betio iaon Tuan te Otabwanin. Aio are e karaoaki n rabanen wiikin te namakaina ae Tuun 2020.

E kakoauaki ao n noraki bwa e teimatoa te botannaomata n aki ira Tuan te Otabwanin ke n teimatoa n karaoi mwakuri aika a eka-nako Tuan te Otabwanin. N ana itera Aobitin Tararuan te Otabwanin ao e riki aio iaan memeren mwakurian ma kamatoaan Tuan te Otabwanin kioina ngkai e rang n uarereke ana rabwata Te Aobiti aio ke n aki tau mwaitia ana taan mwakuri ibukin karaoan mwakuri n tutuo ao tararua ibukin kamatoan iran Tuan te Otabwanin man te tai teuana nakon teuana.

N te tai aio ao Aobitin Tararuan te Otabwanin e a karaoa kamatoaan reitakina ma te Botaki n Bureitimana ibukin kakaean buokan katokan te kanganga aio. N te maroro aio ao e rinanoaki Tuan te Otabwanin 2007 ke te Environment Act Amended 2007 ibukin kamataatakia Bureitimana iaon Tuan te Otabwanin ao kainanoan ma butimwaean aia katamaroa ibukin Tuan te Otabwanin. Aio teuana te tai ae moan te kakawaki ibukin kamatoaan te reitaki n mwakuri ma te botaki n Bureitimana ibukin uaarokoan te Tamaroa iaon kamaton Tuan te Otabwanin. Ti aki ti ngaia ma e reke naba aia tai kaain te tiim aio ma bureitimana n ibuoka n iango ao n maroroakin kawai ma anga tabeua ake ana kona n rang n ibuobuoki ibukin mwakurian kamatoaan te Tua n te aro ae e na kona n baiti aron mwakuriana man itera aika uoua aikai. N reitaki ma aikai ao e reke naba aia tai kaain tiim aikai n kabwarabwara oin taben Bureitimana iaon Tuan te Otabwanin ao tera itera aika a kainanoi iai aia boutoka Bureitimana.

Iai te kataratara ae abwabwaki bwa aio e na teimatoa karaoana n katoa ririki ike e na kona n teimatoa te reitaki ae tamara imarenan taabo n mwakuri ao n butiraoi mwakurian ma kamatoan Tuan te Otabwanin ibukin marurungin te Otabwanin ao te Botannaomata.



Karaaoan te Tutuo nakon Moan rinan n Reirei ke Primary Schools iaon Tarawa  
Teinano inano ma Betio ibukin te kabo iaon te Itiaki ma te Manguroro

E teimatoa n waaki ana tutuo ana tiim Red Cross nakon moan rinan n reirei iaon Tarawa Ma Betio are moanaki man te kaaua n wiiki inanon te kauoua n teirake aio (2<sup>nd</sup> Term). E kaainaki te tiim aio irouia ka kauoman aobitia man te Botaki n Reirei (MOE), Botaki n Mwakuri Ibukin Enwaeromenta Aaba ao Karikirakean te Ununiki (MELAD) n mwangana aika Te Botaki Ununiki (ALD) ao Aobitin Tararuan te Otabwanin (ECD) ao ai te RED-Cross. Te tutuo aio e karoaki n katoa Kauabong ao Kaabong koraki n katoa wiiki ike e na teimatoa karoana n karokoa banen te kauoua n teirake aio.

Aio teuana a na waaki Red Cross iaan te karikirake ae te SOLID Waste Management are ea taaketenia iai moan rinan n reirei ibukin boutokaan te itiaki inanon kaawa n reirei, barongakin maange nakon aekaia nako, kaungan te Ununiki ma karoan o-n-aroka inanon kaawa n reirei, kamanenan raoi te Kirin-Baeki (Green-Bag) ao ai bon kaungakia taan reirei ao riki ataei aron tararuakin aia maange inanon aia kaawa n reirei ike ana kona n rabakau n kakaokoroa aia maange (Waste Segregation) ao man atai ao n kinai rinanin nako maange aika mka ao aika aki mka, baikara maange aika ana riai n rin te Green-Bag ao tera maange aika ana riai n aki rin n te green-bag, ke baikara maange aika a tau ibukin kanan te Aroka ao ai bon boutokaan naba katokan te karenako maange n aki akaka ke te Littering irouia ataei inanon te kaawa n reirei.

Imwin kakaraoan tutuo nakon moan rinan n reirei aikai ao e noraki bwa e korakora te kakamwakuri ao te bitaki inanon kaawan reirei nako. E noraki bwa e tabe n rikirake te itiaki inanon kaawan reirei, baarongakin raoi maange nakon turam ake a tia n katauraoaki ibukin nen maange ake a tia n kakatannakoaki, e noraki naba aron kamanenaan raoi te Kirin-Baeki inanon umwa-n-reirei, Aobiti ao bon inanon te kaawa n reirei, ti aki ti ngaia ma e noraki naba te bitaki iaon karoan te Ununiki ao ai bon noran aron uarereken te karenako maange inanon kaawan reirei nako.

N banen te term aio ao e na tauraoi n kaotinakoaki iai te moanna bwa engaa te Reirei ae e rianako aron itiakina ma mangurorona ike e na iai te kaniwanga nakon te reirei anne. Iai naba kaniwanga nakon Reirei ake a noraki tamaroan aia kekeiaki inanon kakaraoan te tutuo.



Boutokaan Bongin Kamanoan ma Kawakinan Maeun te Tongon te Aonnaba Ke  
Te International Day for the Conservation of the Mangrove Ecosystem

Ibukin Boutokaan Bongin kamanoan ao kawakinan Maeun te Tongon are e teimatoa bukamaruan n te aonnaba ae e bwanin n 26 n Tuurai n katoa ririki ao Aobitin Tararuan te Otabwanin e karaoa ana bokakano i bon marenaia ana taan mwakuri (Staff) iaon te kiniki-tongo. Aio are e a karaoaki I Tanaea n te bong ae te Kanimabong, 24 n Tuurai 2020. E kaainaki te kabio aio irouia tengaun ma teniman tenaan pairs ke taan mwakuri ake a ikatoatoa n uoman. Imwin te kabio aio ao e oti iai bwa a uotanako te tokanikai ataeinnainen te Section ae te LCS (Licensing and Compliance Section) ma mwaitin aia tongo ae 777. N ikotaki ma anne ao botan mwaitin te tongo are e reke man te kaboo aio bon 6,289. Man, aia nanomwaka ataeinnaine aikai ao e reke kanuangaia tenaan tibuta. E mwanenaki karekean kanuanga aikai man te komete are ngaia ae baronga aron te kabio aio.

Toongo ake a reke imwin te kabio aio a bane n kawakinaki ngkai n ana tabo n kabwebwe ke ana Nursery Aobitin Tararuan te Otabwanin ibukin kamaeuia imwain tenaan mwamwananga nako Aonaba ibukin te Uniki Tongon.

